

Populaziuns intactas

La preda da catscha 2014 ei stada sur la media

■ (anr/hh) Igl Uffeci da catscha e pesca dil cantun Grischun ha publicau las cefras definitivs dalla catscha 2014. Las populaziuns dalla selvaschina taxeschia el per intactas. Igl unviern 2013/14 ei staus stregns el sid, perencunter relativamein migeivels el nord dil Grischun. Per la selvaschina ein quellas cundiziuns stadas fa-

voreivlas. Quei muossa denter au-ter il diember da tscharvas registraus avon in onn, respectivamein il diember d'animals curdai muort fleivlezia ni accidents ch'ei staus en rama. Cheutras ei lu era la catscha stada buna. Tut en tut ei la preda stada per 1% pli aulta che la media dils davos diesch onns. Il diember da patentas ei sereducius 2014 en

cumparegliazium cugl onn avon. Era igl onn vargau han ils animals da rapina gronds fatschentau igl uffeci da catscha e pesca. Fertion ch'igl uors ei mo sporadicamein sin viseta el cantun, ein lufs e lufstscherver daventai ina part integrala dalla fauna.

➤ PAGINA 3



Igl onn vargau ei vegniu sittau el Grischun dameins cavreuls ch'ils dus onns avon.

FOTO E. MONN

L'aura ei stada en favur dalla selvaschina

Igl uffeci da catscha e pesca dil Grischun ha publicau las cefras dalla catscha 2014

■ (anr/hh) Las populaziuns da selvaschina ein intactas el cantun Grischun. Quei resorta dil rapport dalla catscha 2014 digl uffeci da catscha e pesca. En cumparegliaziun cugl onn avon ei il diember da patentas perencunter sereudicius, oravontut tier la catsch'aulta e la catscha bassa. Sco quei ch'igl uffeci scriva en siu rapport annual han 5414 persunas retratg igl onn vargau la patenta da catsch'aulta. Quei ei 55 pli pauc ch'igl onn avon. Ina reducziun aunc pli gronda ei da constatar tier la catscha bassa. Quella ei vegnida frequentada igl onn vargau da 1565 persunas, 62 pli pauc che 2013. Perencunter ein biebein 100 catschadurs e catschadurs dapli serendi alla catscha d'atun, numnadamein 1663. Igl onn vargau han 23 candidatas e 145 candidats da catscha absolviu cun success ils examens. Quei ei 25 dameins ch'igl onn avon. Per

ils cuors ed examens da catscha ein 250 persunas s'annunziadas igl onn passau.

Intervenziuns els asils

Suenter in unviern senza grondas nevadas el nord dil Grischun, ein las populaziuns dalla selvaschina stadas bunas la primavera 2014. Oravontut ei vegniu registrau in grond diember da tscharvas. Cun differentas mesiras ha igl uffeci allura empruau da disturbar las tscharvas els asils da catscha, per aschia possibilitar als catschadurs da sittar dapli animals il settember. Entginas mesiras han giu success, autras buca. Sco quei ch'igl uffeci constatescha, sa il problem dil grond diember da tscharvas el Parc naziunal buca vegnir sli-giaus mo aschia, era buca quel dallas tscharvas ch'arrivan per tard igl atun dallas tiaras vischinontas el Grischun. Tut en tut ei vegnius sittau igl onn vargau 4507 tscharvas. Quei ei il secund grond diember da tscharvas sittadas duront in onn el cantun. Duront la catscha d'atun ein pliras tscharvas sittadas en Portenza e l'Engiadina bassa vegnidadas controlladas sin tuberculosa. Neginas dallas emprovas ein stadas positivas. Las mesiras ein stadas necessarias muort la tuberculosa tier biestga e tscharvas el Vorarlberg. Ils diemblers da cavreuls (2568), camutschs (3006), capricorns (470) e pors selvadis (22) ein stai ella rama digl onn avon. Tenor igl uffeci ei la preda da catscha 2014 stada per in pertschien pli aulta che la media dils diesch onns avon. Digl emprem da zerc-ladur 2013 entochen ils 31 da matg 2014 ha igl uffeci registrau el Grischun 2965 animals d'ungla curdai, da quei 792 tscharvas, 1446 cavreuls, 498 camutschs e 229 capricorns. Il diember da muntanias sittaus 2014 ei cun 4742 tocs en rama dils onns avon.

Dameins uolps e lieurs

Las statisticas dalla catscha bassa sco era la catscha da laghetg e da traplas porschan indezis davart las populaziuns dils

animals da rapina pigns, lieurs ed utschals. Aschia ei vegniu sittau levamein pli paucas lieurs brinas e lieurs alvas ch'igl onn avon, sco era dameins uolps e fiergnas. Tier ils utschals se presenta in maletg cuntrari. Il diember da cots selvadis sit-taus ei carschius levamein, aschi bein sco quel da cormorans ed urlauns. Ils animals lubi da catscha bassa ed auters animals pigns vegnan survegnilai dil cantun per part cun projects da monitoring. Sin fundament da quels sa vegnir constatau che lur populaziuns ein bunas e ch'ellas sesviluppeschian a moda persistente. Tut en tut ei vegnius sittau igl onn da catscha 2014 21'811 animals. Quei ei levamein pli pauc che 2013 e che 2012.

Animals da rapina gronds

Danovamein ei la survegionza da catscha stada occupada intensivamein culs animals da rapina gronds. Igl onn 2014 ein dus differentes uors vegni registrai el cantun Grischun. In ei staus sis ga sin vi-seta, en tut 55 dis. Il triep lufs al Calanda ha danovamein survegniu pigns, numna-damein tschun. La fin digl onn dumbra-va il triep diesch tocs. Plirs lufs han bandunau il territori, in ei viagiass entochen a Madonna di Campiglio. 2014 ha igl uffeci giu 63 indezis dil luf-tscherver. Da quels ein 58 annunziadas vegnidadas ord la Surselva. Ella ei la regiun preferida dil luf-tscherver el Grischun. Igl onn vargau ein ulteriuras zonas da ruaus vegnidadas scaffi-

das el cantun Grischun. Il mument existan 277. Ils donns caschunai dalla selvaschina che han stuiu vegnir indemnisai dil cantun restan sin in bass nivel. Igl onn 2014 ha stuiu vegnir sbursau rodund 77'000 francs persuenter. Igl onn avon ei quei stau biebein 60'000 francs. 174 menaders cun tgauns ein stai a disposiziun igl onn vargau per tschercar selvaschina blessada. En tut ein 1127 tschercas stadas necessarias. 54 pertschien da quellas ein stadas encorunadas da success. Muort cunterfatgas dalla lescha da catscha ha la survegionza stuiu reparter 1007 castitgs e far 95 accusaziuns. 97 pertschien dils falliments ein vegni annunziadi dils catschadurs sez.

Surselva: Dumbrau dabia tscharvas

(anr/hh) L'jamna vargada ha la dumbraziun da tscharvas giu liug els dus districts da catscha dalla Surselva. Tut en tut ei vegniu dumbrau 2398 tscharvas. Quei ei rodund 800 tocs dapli ch'igl onn vargau ed aschia tontas sco aunc mai dapi l'entschatta dalla dumbraziun. El district da catscha I ein 1134 tscharvas vegnidadas dumbradas ni biebein 400 dapli ch'igl onn vargau. El district II ein 1264 tscharvas vegnidadas registradas ed era cheu settracta ei d'in plus da rodund 400 tocs. Plinavon han survegionza da catscha e gidonters dumbrau la notg sin il venderdis 776 cavreuls (onn vargau 561), 163 lieurs brinas (110), 137 uolps (82) e 40 tais (54). La dumbraziun da tscharvas survescha sco indicatur pil plan da catscha digl atun vegnent.



Grazia agl unviern migeivel 2013/14 – oravontut el nord dil Grischun – ein las populaziuns dalla selvaschina stadas bunas igl onn passau. Quei demuossa era il grond diember d'animals sittai il settember ed igl atun.